



Comunicado di Prensa

16 di october 2018

Presidente di Cft Raymond Gradus: "Boneiro no ta duna suficiente sustancia na legislacion, tin menasa di escalacion"

Kralendijk - Colegio di supervision financiero di Boneiro, Sint Eustatius y Saba (Cft) a spierta tanto Colegio Ehecutivo como Consejo Insular pa muestra mas firmesa. Cft ta constata pa basta tempo caba cu riba demasiado area Boneiro no ta cumpli cu e normanan legal. Ademas, repetidamente no a cumpli cu palabracion haci cu e entidad publico of no a cumpli cu nan suficientemente. "Si e situacion aki no mehora, un consejo pa instruccion ta inevitabel", segun Presidente di Cft Raymond Gradus.

Durante e bishita di Colegio diamars dia 16 di october a papia cu Gezaghebber, Colegio Ehecutivo, Consejo Insular y e Representante di Reino suplente. Tambe a haci un bishita di trabou na Servicio di Impuesto di Hulanda Caribense, unda Colegio a haya, entre otro, un splicacion tocante recaudacion di impuesto di Reino na Boneiro, Sint Eustatius y Saba.

A tene un combersacion profundo cu e miembranan di Colegio Ehecutivo. Cft a expresa un bes mas su preocupacion pa e calidad di e maneho financiero cu ta deteriorando fuertemente. Den e combersacion cu Colegio Ehecutivo Cft a indica cu, di conformidad cu e legislacion vigente, mester formalisa mas aleu e palabracionnan respectu e plan di mehoramento di e maneho financiero. Mester formula e plan di mehoramento di e maneho financiero actual mas cla y complement'e pa medio di un aplicacion adecuado di e recomendacionnan di accountant den e cuenta anual di 2017. Den caso cu Cft no mira suficiente progreso al respectu y den aplicacion di e plan adapta, anto ta inevitabel cu lo bin un escalacion den forma di un consejo na Secretario di Estado di Asunto Interno y Relacion den Reino pa procede na duna un instruccion. Cft a spierta Colegio Ehecutivo pa preveni esey.

Tambe a debati tocante e preocupacionnan pa loke ta e ciclo presupuestario y di hustificacion. Asina, por ehempel, ainda no a entrega na Cft e presupuesto di 2019 ni e cuenta anual di 2017, pa cualnan Colegio Ehecutivo a pidi un aplasamento te final di september. Por lo tanto, Boneiro no ta cumpli cu e fechanan limite cu ta stipula den e Ley tocante finansa di e entidadnan publico Boneiro, Sint Eustatius y Saba (Ley FinBES).

E bishita aki tabata tambe e prome bishita di Señor H.G.J. (Henk) Kamp. Señor Kamp a sucede Sra. S.M. (Sybilla) Dekker como miembro di Cft entrante dia 1e. di juli riba recomendacion di Hulanda. For di dia 1e. di juli 2018 Cft BES ta consisti di Presidente Raymond Gradus, miembro postula pa BES Herbert Domacassé y miembro postula pa Hulanda Henk Kamp.

[Fin di e Comunicado di Prensa]

Fotografo:

Berber van Beek

Texto na e potret:

Cft a spierta Colegio Ehecutivo pa preveni un instruccion.

Nota pa redaccion – no pa publicacion

Persona di contacto na Cft:

Secretariado di Colegio di supervision financiero Boneiro, Sint Eustatius y Saba

Manus Twisk - Secretario

Telefon (+5999) 461-9081 / (+5999) 461-9082 / (+5999) 461-9084



Email info@cft.cw
Internet www.cft.cw

Persona di contacto cu Prensa:
Jefka Martina
Telefon (+5999) 512-6861